

四庫全書

史部

欽定四庫全書

史部

伊洛淵源錄卷十一

詳校官編修

臣范來宗

刑部郎中

臣許兆椿覆勘

總校官編修

臣王燕緒

校對官編修

臣盧遂

謄錄監生

臣施應培

欽定四庫全書

伊洛淵源錄卷十

宋 朱子 撰

楊文靖公

墓誌銘

胡文定公

自孟子沒遺經僅在而聖學不傳所謂見而知之與聞而知之者世無其人則有西方之傑窺見閒隙遂入中國舉世傾動靡然從之于是人皆失其本心莫知所止

而天理滅矣。宋嘉祐中有河南二程先生得孟子不傳之學于遺經以倡天下而升堂覩奧號稱高弟在南方則廣平游定夫上蔡謝顯道與公三人是也。公諱時字中立姓楊氏。既沒踰年諸孤以右史呂本中所次行狀來請銘。謹按楊氏出于弘農為望姓五世祖唐末避地關中寓南劍州之將樂縣。因家焉。公資稟異甚。八歲能屬文。熙寧九年中進士第。調汀州司戶參軍。不赴。杜門積學。淳湊涵浸人莫能測者幾十年。久之乃調徐州司

法丁繼母憂服闋授虔州司法公燭理精深曉習律令有疑獄衆所不決者皆立斷與郡將議事守正不傾罹外艱除喪遷瀛州防禦推官知潭州瀏陽縣安撫使張公舜民以客禮待之漕使胡師文惡公之與張善也歲飢方賑濟劾以不催積欠坐銜替張公入長諫垣薦之除荆南教授改宣德郎知杭州餘杭縣遷南京宗子博士會省員知越州蕭山縣提點均州明道觀成都府國寧觀後例罷差監常州市易務公年幾七十矣是時天

下多故或說當世貴人以為事至此必敗宜力引耆德
老成置諸左右開導上意庶幾猶可及也則以秘書郎
召到闕遷著作郎及對陳儆戒之言除邇英殿說書公
知時勢將變遂陳論政事其略曰近日蠲除租稅而廣
濟軍以放稅降官是詔令為虛文耳安土之民不被惠
澤而流亡為盜者獨免租賦百姓何憚不為盜夫信不
可去急于食也宜從前詔嘉祐通商榷茶之法公私兩
便今茶租錢如故而榷法愈急宜少寬之諸犯榷貨不

得根究來歷。今茶法獨許根究。追呼蔓延。狎狴充斥。宜
卽革之。東南州縣。均敷鹽鈔。迫于殿最。計口而授人。何
以堪。宜酌中立。額使州縣易辦。發運司宜給糴本。以復
轉般之舊。和預買宜損其數。而實支所買之直。燕雲之
軍宜退守內郡。以省運輸之勞。燕雲之地宜募邊民為
弓箭手。使習騎射。以殺常勝軍之勢。衛士天子爪牙。而
分為二三。宜循其舊。不可增損。凡十餘事。執政不能用。
而敵騎已大入。則又言今日所急者。莫大于收人心。邊

事之興免夫之役毒被海內誤國之罪宜有所歸西北聚斂東南花石其害尤甚宿姦巨猾借應奉之名豪奪民財不可數計天下積憤鬱而不得發幾二十年欲致人和去此三者會淵聖嗣位公乞對曰君臣一體上皇痛自引咎至託以倦勤避位而宰執敎遷安受不辭此何理也城下之盟辱亦甚矣主辱臣死大臣宜任其責而皆首為竄亡自全之計陛下孤立何賴焉乞正典刑為臣子不忠之戒童貫為三路總帥敵人侵疆棄軍而

歸置而不問。故梁方平何灌相繼逃去。大河天險棄而不守。敵人奄至城下。而朝廷不知。帥臣失職。無甚于此。宜以軍法從事。防城所仍用閹人提舉。授以兵柄。此覆車之轍。不可復蹈。淵聖大喜。擢右諫議大夫。敵人厚取金帛。又遂賂以三鎮。遂講和而去。公上疏曰。河朔朝廷重地。三鎮又河朔要藩。今一旦棄之北廷。以二十州之地。貫吾腹中。距京城無藩籬之固。戎馬疾驅不數日而至此。非經遠之謀。四方勤王之師。踰月而後集。使之無

功而去厚賜之則無名不與則生怨不可不慮也如聞三鎮之民欲以死拒守今若以兵躡之使腹背受敵宜可為也朝廷欲專守和議以契丹百年之好猶不能保寧能保此盟言乎夫要盟神不信宜審處之無至噬臍于是淵聖乃詔出師而議者多持兩端屢進屢却公又言聞敵人駐兵磁相劫掠無算誓書之墨未乾而叛不旋踵肅王初約及河而反今挾之以往此叛盟之大者吾雖欲專守和議不可得也今三鎮之民以死拒之于

前吾以重兵擁其後。此萬全之計。望斷自宸衷。無惑浮言。而議者不一。故終失此機會。于是太原諸郡皆告急矣。太學生伏闕乞留李綱。种師道軍民從之者數萬人。執政慮其生亂。引高歡事。揭榜于衢。且請以禮起邦彥。公言。士民伏闕。詬罵大臣。發其隱慝。無所不至。出于一時忠憤。非有作亂之心。無足深罪。李邦彥首畫遁逃之策。捐金割地。質親王以主和議。罷李綱而納誓書。李鄴奉使失辭。惟敵言是聽。此二人者。國人之所同棄也。今

敷告中外乃推平賊和議之功歸此二人非先王憲天
自民之意宜收還榜示以慰人心邦彥等既罷趙野尚
存公復言野昔嘗建言請禁士庶以天王君聖為名者
上皇後以為諂諛之論廢格不行而野猶泰然不以為
耻乞賜罷黜上皆從之或意太學生又將伏闕鼓亂乃
以公兼國子祭酒遂言蔡京以繼述神宗皇帝為名實
挾王安石以圖身利故推尊安石加以王爵配享孔子
廟廷然致今日之禍者實安石有以啓之也謹按安石

昔為邪說以塗學者耳目敗壞其心術者不可縷數姑
即一二事明之昔神宗皇帝稱美漢文罷露臺之費安
石乃言陛下若能以堯舜之道治天下雖竭天下以自
奉不為過也夫堯舜茅茨土階其稱禹曰克儉于家則
竭天下者必非堯舜之道後王黼以三公領應奉司號
為享上實安石自奉之說有以倡之也其釋鳧鷖之末
章則曰以道守成者役使羣衆泰而不為驕宰制萬物
費而不為侈按此章止謂能持盈則神祇祖考安樂之

無後艱耳而安石獨為此說。後蔡京輩爭以奢僭相高。輕費妄用窮極淫侈。實安石此說有以倡之也。其害豈不甚哉。乞正其學術之謬。追奪王爵。明詔中外。毀去配享之像。遂降安石從祀之列。諫官馮澥力主王氏上疏。詆公又會學官紛爭有旨皆罷。即上章乞出。除給事中。章又四上請去益堅。以徽猷閣直學士提舉西京崇福宮。又懇辭職名不當得。有旨楊某學行醇固。諫諍有聲。請閒除職。累月懇辭。宜從其志。以勵廉退。改徽猷閣待

制上即位除工部侍郎論自古賢聖之君未有不以典
學為務者以君德在是故也上然之除兼侍講二年以
老疾乞出除龍圖閣直學士提舉杭州洞霄宮四年上
章告老從之紹興五年四月二十四日終于正寢享年
八十有三葬本邑西山之原近臣朱震奏公嘗排邪說
以正天下學術之謬辯誣謗以明宣仁聖烈之功雪冤
抑以復昭慈聖獻之位據經論事不媿古人所著三經
義辯有益學者乞下本州抄錄仍優恤其家有旨贈官

賻以金帛。娶余氏。贈碩人。先卒。子五人。迪早卒。迥適。適造已仕女四人。長適陳淵。次陸棠。次李郁。次未嫁。孫男七人。孫女五人。曾孫一人。公天資夷曠。濟以問學。充養有道德器。早成。積于中者純粹。而閎深。見于外者簡易。而平淡。閒居和樂。色笑可親。臨事裁處。不動聲氣。與之遊者。雖羣居終日。嗒然不語。飲人以和。而鄙薄之態。自不形也。推本孟子性善之說。發明中庸大學之道。有欲知方者。為指其攸趣。無所隱也。當時公卿大夫之賢者。

莫不尊信之。熙寧初代余典教渚宮。始獲從公遊。三十年間。出處險夷。亦嘗覩之熟矣。視公一飯雖蔬。食脆甘若皆可于口。未嘗有所嗜也。每加一衣。雖狐貉縕袍皆適于體。未嘗有所擇也。平生居處。雖敝廬厦屋。若皆可。以託宿。未嘗有所美而求安也。故山之田園。皆先世所遺守。其世業亦無所營。增豆區之入也。老之將至。沉伏下僚。厄窮遺佚。若將終身焉。子孫滿前。每食不飽。亦不改其樂也。然則公于斯世所欲。不存果何求哉。心則遠。

矣。凡訓釋論辯以闢邪說存于今者其傳寔廣故特載
宣和末年及靖康之初諸所建白以表其深切著明而
公之學于河南小嘗試之其用已如此所謂援而止之
而止必有以也。進不隱賢必以其道豈不信乎。世或以
不屑去疑公蓋淺之為丈夫也。銘曰天不喪道文其在
茲。維天之命尸者其誰孰能識車中之狀意欲施之兄
弟而處並為世師。偉茲三賢濶步共馳有學術業顏其
饒而公名最顯垂範有詞豈不見庸孔艱厥時狂瀾奔

潰砥柱不鼓邪說害正倚門則揮嗟彼姦罔譏言詆欺
我扶有極人用不迷奚必來世判其是非有援則止直
道何疵不勉而和展也可夷河流在北伊水之湄誰其
似者訂此銘詩

龜山誌銘辯

宏問何故西方之傑窺見間隙遂入中國答曰自孟子
既沒世無傳心之學此一片田地漸漸拋荒至東晉時
無人耕種佛之徒如達磨輩最為桀黠見此間隙以為

無人遂入中國面壁端坐揚眉瞬目到處稱尊此土之人拱手歸降不能出他圈套

宏又問佛之徒既是直指人心見性成佛何故却言人失其本心莫知所止答曰釋氏自言直指人心見性成佛吾却言失其本心莫知所止大段懸遠宏又問何故懸遠答曰昔明道先生有言以吾觀於儒釋事事是句句合然而不同宏又問既云事事是句句合何故却不同答曰若于此見得許汝具一隻眼

宏又問據楊氏家錄稱先生不欲為市易官呂居仁亦云辭不就今誌中何故削去不就二字答曰此是它門未曾契勘古人出處大致若書不就兩字便不小了龜山差監市易務即辭不就除秘書省校書郎却受而不辭似此行徑雖子貢之辨也分說不出來今但只書差監市易務公年將七十矣即古人乘田委吏之比意思渾洪不卑小官之意自在其中乃是畫出一箇活底楊龜山也并遷著作郎并遷英殿說書只一向滾說將去

不消更引高麗國王事說他龜山前代如伍瓊亦嘗薦諸賢于董卓卓召用之除申屠蟠外諸賢皆至或旬月遍歷三臺而無非之者此亦是有底事不足為文飾也宏又問攻王氏一章却似迂濶何故載之答曰此是取王氏心肝底膾子手段何可不書書之則王氏心肝懸在肉案上人人見得而詖淫邪遁之辭皆破矣

宏又問或說龜山被召過南京見劉噐之劉問此行何為龜山曰以貧故劉曰若以貧故則更不消說答曰傳

言如此未知信否若據吾則不然劉若問此行何為但對曰老年無用處且入這保社它若更問還有轉身一路否但曰料得無處分說一任傍人點檢不然者若問此行何為只答云竿木隨身亦自脫灑

宏再問何故載果何求哉心則遠矣一句答曰陶公是古之逸民也地位甚高決非惠遠所能招劉雷之徒所能友也觀其詩曰結廬在人境而無車馬喧問君何能爾心遠地自偏即可知其為人故提此一句以表之而

龜山之賢可想見矣世人以功名富貴累其心者何處更有這般氣象但深味心則遠矣一句即孟子所謂所欲不存若將終身若固有之氣象亦在其中矣宏又問如何是心則遠矣答曰或尚友古人或志在天下或慮及後世或不求人知而求天知皆所謂心遠矣

宏又問行狀云陳公瓘鄒公浩皆以師禮事先生何故不載答曰凡公卿大夫之賢者於當世有道之士莫不師尊之其稱先生有二義一則如後進之于先達或年

齒居長或聲望早著心高仰之故稱先生若韓子之于
盧仝歐陽永叔之于孫明復是也其一如子弟之于父
兄居則侍立出則杖屨服勤至死心喪三年若子貢曾
子之于仲尼近世呂與叔潘康仲之于張橫渠是也今
一槩稱以師禮事先生恐二公之門人未達故不復書
大觀庚寅在都城嘗見了翁與龜山書稱中立先生初
亦疑之後乃知字者親厚之意先生者高仰之稱也亦
可見矣兼龜山道學自為當世所高而誌中已稱公卿

大夫之賢者莫不尊信之矣不必更引二公以為重

宏又問行狀云胡公之徒實傳其學此事如何答曰吾
于謝游楊三公皆義兼師友實尊信之若論其傳授却
自有來歷據龜山所見在中庸自明道先生所授吾所
聞在春秋自伊川先生所發汝但觀吾春秋傳乃是白
頭六十歲以後所著必無大段牴牾更有改易去處其
書十萬餘言大抵是說此事試詳閱之必自知來歷矣

答陳幾叟書

龜山誌銘初不敢下筆以情意之厚義難固辭故不得已勉強為之世人之知龜山者甚多而疑謗之者亦不少故安國論其行已處自飲食衣服居處之際至于若將終身不改其樂事皆有實以折服衆多之口至其大略又用語孟正蒙三說為證故措辭雖不工而意却有主只如差監市易務事乃平生履歷故不可闕若據龜山所言却甚明白雖書不就無害也但行錄乃言不欲為市易官于語脉中轉了龜山之意却似嫌其太卑

冗而不為須當削去不就二字夫年已七十欲為筦庫
即見得遺佚阨窮不憫怨之意正要此一句用豈可不
書乎其後以秘書召遷著作郎等事此正謂援而止之
而止者也夫援而止之而止未有是處而龜山獨稱為
仁者特以進不隱賢必以其道耳故備載所論當時政
事十餘條此事它人不能言而龜山獨能言之又時然
後發所以尤可貴耳當時宰執中若能聽言委直院吳
元忠輩畫一條具因南郊赦文行下決須救得一半不

至如後來大段狼狽也若龜山此舉可謂老婆心切矣
世人不察其用心之所在知之者見其赴召則曰此御
筆也夫違御筆者以大不恭論自政和末年以來已是
海行指揮豈可以此定賢者之出處以其不可違而就
召假有論及申屠蟠笑而不答之事則又何辭以對故
龜山之赴召非畏海行指揮乃懼天下之人在塗炭之
中而有惻然不忍人之心是以不屑去耳故安國于龜
山宣和靖康中諸所建白詳載其本末所以致其區區

之意破紛紛之議使天下後世疑謗者莫不自消釋矣其章疏中所論王氏著為邪說以塗學者耳目敗壞其心術又即一二事以明之此真拔本塞源者也幾叟何以尚言猶是一時之論乎五經皆空言也雖不如春秋一句即是一事然明理以垂訓以待後之學者豈曰小補之哉故說者以謂五經如藥方春秋猶用藥治病此亦互相發耳誌中又載近臣所論闢邪說以正天下學術之謬所著三經義辯有益學者夫以義辯為有益則

新義之為害可知故誌篇之末獨言凡著述論辯其存
于今者非見諸行事故因此語反覆證明諸所建白之
尤為深切耳而著述論辯之功自在若以為緩辭則誤
矣故安國意不欲有所改更必欲更之但曰著述論辯
存于今者其傳浸廣可也公更思之如何

記差市易務事始末

陳淵

龜山宣和四年既罷祠官貧甚不果赴部郭慎求在朝
以書問所欲公年已七十矣

癸巳生宣和四年歲在壬寅年已七十答以

老不能辦事惟求一莞庫為貧耳慎求得書詢吏部見
闕監當官近毗陵未差者吏部報以常州市易務即為
求得之馳以告公慎求初亦不知前一日為人所授公
聞之曰非見闕固于吾事無濟然市易事吾素不以為
然縱便得祿其可就乎蓋慎求不察吾意耳五年秋未
果退闕因傅國華之薦召赴都堂審察即以足疾辭不
赴六年國華又以前請未行再薦遂以秘書郎召對且
御詔若辭者坐罪乃不克免先是傅國華奉使三韓得

旨許于經由三路凡人材可薦者薦之不限以員及歸
具奏臣往來京西淮浙人材可薦者甚多然抱道處晦
無如楊時者願以所得薦三路人材薦此一人上亦聞
公名故始召審察又召上殿云若謂監市易務不就除
秘書郎即就即非同時事失其實矣今削去不就二字
為當更恐欲見其實故具之然如市易務方待闕未上
雖不見于墓誌亦可也

行狀略

呂舍人

虔守楚潛議法平允而通判楊增多刻深先生每從潛
議增以先生為附太守輕已及潛去後守林某議不持
平先生力與之爭方知先生能有守也

知潭州瀏陽縣安撫使張公舜民雅敬重先生每見必
設拜席與均禮知杭州餘杭縣簡易不為煩苛遠近悅
服蔡京方相貴盛母前塋餘杭用日者之言欲浚湖瀦
水為形勢便利托言欲以便民事下餘杭縣先生詢問
父老人人以為不便即條上其事得不行

知越州蕭山縣蕭山之人聞先生名不治自化人人圖畫先生形像就家祠焉

或說當世貴人以為事至此必敗宜力引耆德老成置上左右開導上意庶幾猶可及也會路允迪傳墨卿使高麗高麗王問兩人龜山先生今在何處兩人對方召赴闕矣及還遂以名聞因勸政府宜及此時力引先生政府然之遂以秘書郎召及對陳儆戒之言上嘉納焉太原被圍朝廷遣姚古救援古逗留不進先生上言乞

誅古以肅軍政又率同列上疏論蔡京王黼童貫等罪惡或死或貶乞罷宦者典修京城事且錄五代史傳以進朝廷置詳議司議天下利病先生以為三省政事所出六曹分治各有攸司今乃別辟官屬新進小生未必賢于六曹長貳也朝廷從其議又乞褒復元祐名臣凡在黨籍者力辯宣仁詆謗乞復元祐皇后位號凡所論皆切當時要務

太學諸生詣闕上書議者疑其生事傲亂先生即見上

言諸生欲忠于朝廷耳本無他意但擇老成有行義者
為之長貳即自定矣淵聖喜曰此無逾卿者矣即命先
生兼國子祭酒

今上即位本中之先君子初在政府首為上言先生之
賢于是除工部侍郎

先生天資仁厚寬大能容物又不見涯涘不為崖異絕
俗之行以求世俗名譽與人交終始如一性至孝幼喪
母哀毀如成人事繼母尤謹熙寧中既舉進士得官聞

河南兩程先生之道即往從之學是時從兩先生學者甚衆而先生獨歸閒居累年沉浸經書推廣師說窮探力索務極其趣涵蓄廣大而不敢輕自肆也

本中嘗聞于前輩長者以為明道先生溫然純粹終身無疾言遽色先生實似之

遺事

九條

明道在潁昌時先生尋醫調官京師因往潁昌從學明道甚喜每言曰楊君最會得容易及歸送之出門謂坐

客曰吾道南矣先是建州林志寧出文潞公門下求教潞公云此中無以相益有二程先生者可往從之因使人送明道處志寧乃語定夫及先生先生謂不可不一見也于是同行時謝顯道亦在謝為人誠實但聰悟不及先生故明道每言楊君聰明謝君如水投石然亦未嘗不稱其善伊川自涪歸見學者凋落多從佛學獨先生與謝丈不變因歎曰學者皆流于異端矣惟有謝楊

二君長進

見龜山語錄

楊時于新學極精今日一有所問即能知其短而持之
介甫之學大抵支離伯淳嘗與楊時讀了數篇其後盡
能推類以通之

見程氏
遺書

伊川答楊中立論西銘中立書尾云判然無疑伊川曰
楊時也未判然

見邢寬所記
尹和靖語

舊在二先生之門者伯淳最愛中立正叔最愛定夫觀

二人氣象亦相似

見上蔡
語錄

先生曰官司設法賣酒所在張樂集妓女以來小民此

最為害教而必為之辭曰與民同樂豈不誣哉夫引誘
無知之民以漁其財是在百姓為之理亦當禁而官吏
為之上下不以為怪不知為政之過也且民之有財亦
須上之人與之愛惜不與之愛惜而巧求暗取之雖無
鞭笞以強民其所為有甚於鞭笞者矣余在潭州瀏陽
方官散青苗時凡酒肆茶店與夫俳優戲劇之罔民財
者悉有以禁之散錢已然後令如故官賣酒舊常至是
時亦必以妓樂隨處張設頗得民利或以請不許往往

民間得錢遂用之有力

見龜山語錄

又言常平法州縣寺舍歲用有餘則以歸官賑民之窮
餓者余為瀏陽日方為立法使行旅之疾病飢踣于道
者隨所在申縣縣令寺舍飲食之欲人之入于吾境者
無不得其所也其事未及行而余以罪去官至今以為
恨

元城劉公問胡瑗曰毗陵莫常得書中立安否曰楊先
生近有除命以秘書郎召對公曰誰所薦瑗曰傳聞是

蔡攸公曰此曹立黨相傾不知中立肯來否

見道
錄

胡文定公與楊大諫書曰大諫初承詔命衆論有疑安

國獨以為以明道先生之心為心者裂裳裹足不俟屨

而在途也又與宰相書曰龍圖閣直學士致仕楊公時

造養深遠燭理甚明混迹同塵知之者鮮

知之者知其
文學而已不

知者以為蔡氏所引此公
無求于人蔡氏焉能挽之

行年八十志氣未衰精力少

年殆不能及上方嚮意儒學日新聖德延禮此老置之

經席朝夕咨訪裨補必多至如裁決危疑經理世務若

燭照數計而龜卜又可助相府之忠謀也又答胡應仲書云楊先生世事殊不屑意雖袒裼裸裎不以為浼見胡

文定
公集

昔西南夷人嘗以梅聖俞雪詩織布而永叔只于野錄載之其事不入誌銘然則姓名為蠻夷君長所知豈足道哉龜山行狀中載高麗國王事所以不得書也見胡氏傳

家錄

遵道墓誌銘略

此昔先君子吏部府君所作

公諱迪字遵道為髫兒已能力學指物即賦凜然如成人既冠益貫穿古今孝友和易中外無間言平居無喜愠色至急人困乏而樂其為善則矯然敢為必極其意而後已與人辯論綱振條析發微指極氷解的破聞者欽聳退而察其私言若不能出諸口故無賢不肖愛敬之蓋度不身踐不苟言也里有貨訟不決者連年公一言而兩家為之平其誠信于人如此遊太學聲出等夷一旦棄而不顧抱經遊于伊川之門以藐然少年周還

羣公之間同門之士咸斂手以推先伊川少然可雅器

許之

伊川答龜山書曰令子名迪者好學質美當成遠器

于易春秋尤精詣崇寧

三年以疾卒予不及識公自來閩中多從龜山門士遊

間論近世學者至公皆曰吾不及也謹為之銘銘曰斯

文盛衰天實命之有嗜其徑異端乘之道堙不治以與

世違有志于得俗學昏之以見自私乖戾莫施孰為毅

然莫秉莫愔天蓋祐之使與斯文屹屹龜山淵源伊洛

如星之斗以表後學公為之子妙質夙成目濡心淳食

息訓經不躐不陵師訓是程軌道以趨不畔墨繩行滿
鄉黨世孰知之遺文蔚然不可瑕疵胡不百年以究其
業齋志莫陳方壯而折天其或者尚相公子我銘幽寯
以告來世

伊洛淵源錄卷十

欽定四庫全書

伊洛淵源錄卷十一

宋 朱子 撰

劉起居

墓誌銘

許景衡

公諱安節字元承温州人資稟不凡方兒時已有遠度
比長嗜學有所未達思之夜以繼日必至于得而後已
少與從父弟今徽猷閣待制安止相友愛皆以文行為

士友所稱既冠游太學元符三年擢進士第調越州諸
暨主簿國子祭酒率其屬表留公太學不報除萊州州
學教授未行改河東提舉學事司管勾文字改宣德郎
召對便殿公言春宮宜慎擇官屬雖左右趨走者必惟
其人又論節儉及君子小人和同之異上稱善顧問甚
悉即日擢為監察御史數決大獄所平反甚衆居數月
攝殿中侍御史時公方謁告省親既陞辭而命下不及
供職而歸俄除起居郎趣赴闕公迎父宣義而西居無

何宣義思歸公欲乞外補宣義固止之明年遷太常少
卿而言者斥公在言責時無所建明且久不寧親責守
饒州州荐飢公至大發廩賑之又檄旁郡無遏糴軍儲
不足宅日皆強取諸民公曰歲荒如此重困之可乎宅
司宜有相通者政應調適其緩急耳市人數為在官者
所擾逃散郊外公躬率以廉察屬化之未幾飢者充乏
者濟逃者復于是與之治賦出裁制貢奉之須俾屬縣
先期戒民無倉卒之擾移知宣州去饒州二日民遮留

之涕泣不忍別耆壽以為吾州自范文正公後惟吾劉公而已至宣十日而水大至公分遣其屬具舟振溺而躬督之晝夜不少休所活幾數千人而遠近流民至者以萬數公闢佛廟以處之發廩以活之一無失所者其將發廩也吏以為法令不可而部使者亦持其議公皆弗聽大疫公命醫官治甚力其得不死者不可計政和六年夏五月卒年四十九娶何氏公之娶也初行親迎之禮鄉人慕而繼之旁郡聞多竊笑比年朝廷頒五禮

于天下於是人皆思公之倡始云子男曰暨孫有異質
九歲而天一女尚幼以安止之子誠為後公天資近道
而敏于學問其所趨尚非世俗所謂學者嘗從當世賢
而有道者游始以致知格物發其材沉涵熟復存心養
性久之于是有得其貌溫然望之知其有容遇人無貴
賤小大一以誠雖忤已者未嘗見其有怒色恚辭也其
在河東同僚有交惡者一日邂逅公座聞其緒餘不覺
自失相與如初其恬靜弗校宜若易與者至于有所立

則挺然不可回奪曾不知禍福利害可以為避就也鄒公浩以右正言得罪公與其所厚數輩追路勞勉之朝廷震怒追逮甚急人皆惴恐公獨泰然如平時既而哲宗察其無他有詔釋之而公亦自若也事親能承順其意教養諸弟涵容周還有古人所難能者族居踰百口上下愛信雖臧獲無間言也常曰堯舜之道不過孝弟天下之理有一無二迺若異端則有間斷矣聞人善如已出或歸以過則未嘗辯遇事不擇劇易人所厭苦者

任之裕然無迫遽勤瘁之色其與人遊常引其所長而陰覆其不及諸暨令不事事州將欲易他邑公既左右之振其綱條又稱其長者將卒善待之宣州賑濟公疏以為非敢專也蓋有所受之故朝廷錄部者之功而進秩焉蓋其志非敢私佚其身而在于為人其所施置常在于公天下以為不如是則非所謂合內外通彼我也所治二州專以仁義教化平易近民民有訟委曲訓戒之俾毋再犯間有鬪者將懲于官則曰何面目復見府

公遂捨去以是廷無可治之事或踰旬不施管扑

遺事

或問劉子進乎曰未見它有進處問所以不進者何曰
只為未有根因指庭前茶蘼曰此花只為有根故一年
長盛如一年問何以見他未有進處曰不道全不進只
它守得定不變却亦早是好手如廉仲之徒皆忘却了

見上蔡
語錄

尹侍講

墓誌銘

呂稽中

先生洛人也姓尹氏曾祖諱仲宣娶張氏生七子而二子有名長子諱源字子漸是謂河內先生次子諱洙字師魯是謂河南先生河內娶何氏生四子其長子諱林官至尚書虞部員外郎娶劉氏萬年縣君劉氏卒陳氏福昌縣君是生先生先生諱煒字德充少孤奉母陳氏以居為進士業年二十師事伊川程夫子先生應進士舉答策問議及元祐貴人先生曰噫尚可以干祿乎哉

不對而出告于程夫子曰吾不復應進士舉矣子曰子有母在先生歸告其母母曰吾知汝以為善養不知汝以祿養于是先生退不復就舉程夫子聞之曰賢哉母也大觀中新學日興有言者曰程頤倡為異端尹焞張繹為之左右先生遂不欲仕而聲聞益盛德益成同門之士皆尊畏之程夫子曰我死而不失其正者尹氏子也靖康元年朝廷初辨忠邪召用四方才德之士以布衣召先生先生謝不用既往又謝不欲朝大臣知不能

留也授以和靖處士而歸明年金人陷維陽先生之家
死于兵先生既死而復蘇竄于長安山中轉徙四五年
而長安陷劉豫僭位于京師思有以繫天下之望則使
其偽帥趙斌卑詞厚禮來召先生具供帳衛從于山中
甚盛先生逃去夜徒步渡渭逃竄山谷中崎嶇走山間
遂至閬中久之往來巴中止于涪紹興五年有從臣言
先生之道上召先生于涪曰昔者之召程頤蓋自布衣
除崇政殿說書遂以左宣教郎崇政殿說書召先生先

生力辭十數上勅有司加禮敦遣不已六年先生辭官而赴召蜀之學者為先生立祠于涪七年至九江有言者攻毀程氏先生復辭曰學程氏者惇也生事之二十年今又二十年矣請就斥朝廷耻之于是大臣顯言先生拒劉豫之節學問之正上又思見先生召之愈急禮益至先生辭避已數十迫上命布衣至行在所而病上賜之金帛使大臣存問慰勞須其病愈必受命而後朝病愈先生朝又辭于上前上曰卿尚可辭邪朕渴卿久

矣知卿之從伊川也俟卿以講學不敢以有他先生遂
就職又除秘書郎先生年六十七矣八年二月除秘書
少監月餘以病求去不許四月賜緋衣銀魚象笏與御
府珍玩之物先生益衰且病益求去改除直徽猷閣主
管萬壽觀崇政殿說書九月除太常少卿兼說書十一
月除權禮部侍郎兼侍講進官左通直郎而先生病日
作不能朝告病甚于朝廷十二月除徽猷閣待制提舉
萬壽觀兼侍講先生曰病不能朝矣而寵祿日至何功

德以當之上章十餘不已朝廷哀其病且老九年二月使以待制提舉江州太平觀而去先生去之平江虎丘十年正月先生年七十曰七十而老尚矣遂致仕進官左奉議郎而從其請十二月先生如紹興居二年而沒年七十有二矣上命越制以賻之贈官四等先生娶張氏追封令人生子均仕為將仕郎雒陽之陷與張令人皆死惟諸女在立孫鎮為均子稽中聞之先生之學學聖人者也曰聖人必可以學而至也而不可以為也玩

味以索之踐履以身之涵養以成之有叙于是乎下學上達窮理盡性而無贅無外者學之正也故先生莊敬仁實不過于心不欺闇室自誠而明以之開物成務推而放諸四海而準其于聖人六經之言耳順心得如出諸已見于容貌聲音之間望之儼然也即之則溫言則厲天下知道者必宗之不知者必慕之小人見之必草面後有聖人不易先生之道矣然而先生進不得施之天下退未嘗筆之于書與羣弟子言據六經發明問答

不為講解文書獨嘗奉詔撰論語解今行于世

遺事

十條

和靖因蘇昞見伊川自後半年方得太學西銘看

見所

錄戶和靖語下同

和靖言初見伊川時教煇看敬字煇請益伊川曰主一則是敬當時雖領此語然不若近時看得更親切寬問如何是主一願先生善喻和靖言敬有甚形影只收斂身心便是主一且如人到神祠中致敬時其心收斂更

著不得毫髮事非主一而何

尹彥明與思叔同時師事伊川先生思叔以高識彥明以篤行俱為先生所稱先生沒思叔亦病死彥明窮居教學未嘗少自貶屈常以先生教人專以敬以直內為本彥明獨能力行之彥明嘗言先生教人只是專令用敬以直內若用此理則百事不敢輕為不敢妄作不愧屋漏矣習之既久自然有所得也因說往年先生自涪陵歸日日見之一日因讀易至敬以直內處因問先生

不習无不利時則更無睹當更無計較也邪先生深以
為然且曰不易見得如此且更涵養不要輕說

見呂氏
雜誌

温州鮑若雨商霖與鄉人十輩久從伊川一日伊川遣
之見和靖次日伊川曰諸人謂子靳學不以教渠果否
先生曰惇以諸公來依先生之門受學惇豈敢輒為他
說萬一有少差便不誤它一生伊川領之

見祁寬所錄
尹和靖語下

同

和靖與思叔共學之久伊川問二子尋常見處同否有

差否自覺如何為我言之和靖曰惇不逮思叔如凡請問未達三四請益尚有未得處久之乃得如思叔則先生纔說便點頭會意往往造妙只是惇雖愚鈍自保守得若思叔則惇未敢保也伊川笑曰也是也是自是每同請益退伊川必謂諸郎曰張秀才如此不待尹秀才肯待

子謂尹惇魯張繹俊俊恐他日過之魯者終有守也

程見

氏遺書

下同

尹子張子見先生曰二子於頤之言如何尹子對曰聞先生之言言下領意惇不如繹能終守先生之學繹不如惇先生欣然曰各中其病

和靖曰昔與范元長同見伊川偶有幹先起下階伊川謂范曰君看尹彥明他時必有用於世元長次日說如

此蓋伊川平日元不曾許人

見邢寬所錄
尹和靖語

靖康元年同知樞密院事种師道奏伏見河南府布衣尹惇學專師古行足勵俗潛心允蹈踰三十年西都學

者皆推仰之未嘗應書不求仕進若蒙召致俾預講說
必有補益召至京師十月賜號和靖處士以歸戶部尚
書孫傳御史中丞呂好問戶部侍郎邵溥中書舍人胡
安國奏臣等伏覩河南府布衣尹焞學窮根本德備中
和言動惟時皆可師法器識宏遠可以任大臣等淺陋
不足以盡知然近來招延之士無有出其右者昨緣朝
廷特召河南敦迫赴闕伏聞命之處士以歸使焞韜藏
國器不為時用未副朝廷仄席求賢之意伏望聖慈特

加職擢以慰士大夫之望尋以金人犯闕不及再見

見難

儼集

和靖在瀘州一室名曰遂志齋取易致命遂志之義在
涪陵縣所居名曰習堂取學而時習之之義在千福院
一室名曰六有齋取橫渠先生所謂言有教動有法晝
有為宵有得息有養瞬有存之意一室名曰三畏齋取
畏天命畏大人畏聖人之言之意

見涪陵
記善錄

紹興五年史館修撰兼侍讀范冲奏伏覩和靖處士尹

煇誠明之學實有淵源直方之行動合規矩靖康中朝廷以布衣特起累加津遣既至京師懇求還山賜處士號建炎間煇逃竄山谷翟興為河南鎮撫使聞其名遣使延聘煇亦不就今流落在蜀臣與之遊處三十餘年得其為人內外淳備毫髮無玷實為鄉閭之所尊禮士友之所矜式迹其所得于已表見于外臣無能髣髴舉以代臣允愜公議六月十五日聖旨召赴行在仍令川陝宣撫司以禮津遣宣撫司劄下涪州津遣知州事李

瞻申尹處士雖寓居本州千福院然獨處一室嘉遯養
浩志尚高潔邦人莫得而見恐非有司移文可致乞自
使司專委官一員依已得聖旨以禮津遣上副朝廷舉
逸求賢興治美俗之意于宣撫司差官敦遣先生四狀
辭免不獲明年九月乃行先是伊川先生謫居于涪涪
人立祠于北巖先生避地偶亦居焉至是以文告辭曰
惇甲寅孟秋始居涪陵已卯孟冬誤辱召命繼下除書
實嗣講事人微望輕敢紹前躅辭不獲命勉赴行在有

補于世則未有也不辱其門則有之今茲啓行惟先生
有以鑒之七年二月至江州以病少留四月上第八狀
云竊見臣寮上言程頤之學惑亂天下有為此學鼓扇
士類者皆屏絕之明詔天下惇實師程頤之學垂二十
年學之既專自信益篤自壯至老居之甚安使惇濫列
經帷其所數繹辟陋之學亦不過聞於師者不惟無以
發明經旨又且仰惑聖聰惇雖甚愚敢偷一時之顯榮
不顧四方之公議捨其所學上欺君父加以疾病日增

精神衰耗決不能支持前進乞令自便訪藥求醫免令
道塗填委溝壑于是右相張公浚奏臣先備員川陝宣
撫處置使竊見和靖處士尹焞緣叛臣劉豫父子迫以
偽命焞經涉大河投身山谷自長安徒步趨蜀崎嶇千
餘里乞食問路僅獲生全臣嘗延請至司與之款接觀
其所學所養誠有大過人者紹興甲寅春臣被命還朝
蓋嘗以焞之姓名達之天聽今陛下博采羣議召置經
筵而焞辭免新命未聞就道伏望聖慈特降睿旨令江

州守臣疾速以禮敦遣五月二十九日奉聖旨依奏先生又辭不得已九月乃至國門猶引前說力辭云列之經筵陳說上側守其師法則亂聖聰趨時苟合則負素志此其所以被寵若驚進退失據者也至二十狀不允乃受命入對

見難儻集及涪陵記善錄

戊午八月二十九日講筵初開上問先生孟子謂紂一夫如何先生曰此為當時之君而言也時有進疑孟子說者上問程頤謂孟子如何先生曰程頤不敢疑孟子

見祁寬所錄
尹和靖語

尹彥明在經筵嘗從容說黃庭堅如此作詩不知要何

用

見呂氏
雜誌

紹興戊午先生上奏曰本朝兵革之禍亙古未聞然賴
祖宗德澤之厚陛下勤撫之至所以億兆之心無有離
異遠近愛戴國勢可保前年徽宗皇帝寧德皇后凶問
遽來莫究不豫之狀天下之人痛心疾首而陛下方且
屈意降心迎奉梓宮請問諱日為事遂使敵意益驕謂

我無人乃再啓和議于今日意欲潛圖混一臣妾中國
陛下十二年勤撫之功當決于此矣況先王之禮父母
之讐不與共戴天兄弟之讐不反兵今信仇敵之詐謀
而覲其肯和以紓目前之急豈不失不共戴天反兵之
義乎臣竊為陛下痛惜之更願深謀熟慮採衆論以全
大計則天下幸甚又與宰相秦檜書曰敵人與我有不
共戴天之讐靖康以來屢墮其術今若一屈使為口實
要怨誨兵自困自斃豈忍為此議乎比者竊聞主上以

父兄未返降志辱身于九重之中有年矣然亦未聞敵人悔禍還二帝于沙漠繼之梓宮崩問不詳天下之人痛恨切骨則敵人藐視朝廷之意不言可見天下方將以此望于相公覲有以革其已然豈意為之已甚乎今之上策莫如自治自治之要內則進君子而遠小人外則賞當功而罰當罪使主上之孝弟通於神明主上之道德成于安強勿以小智小義而圖大功不勝幸甚復有辭免待制第三狀云臣每念誤受寵榮茂聞補報比


嘗不量分守輒及國事識見迂陋已驗于今跡其愚庸

豈堪時用第四狀又言之乃得外祠

見戊午議
及難儼集

先生卒門人呂堅中以文致祭其略曰恭惟善誘循循
不倦俾沉若酣培植聞見曰敬以直內是乃持守維窮
維格理則昭剖由是致知上達誠明知而罔覺匪致之
精養不以厚行不以力雖曰有見乃德之賊厚養力行
必踐必久勝已之私馴以固有略則易詐拘則易窮才
意所測鮮克有終喜怒哀樂聖愚同然發欲中節時然

後言猗與吾道易簡以求如霽則行如潦則休或謂無
心先生曰否何以知覺惟私是醜或謂勿思先生曰豈
我亦有思思無邪爾先生之言測遠窮深其未傳者匪
言實心嗚呼哀哉



伊洛淵源錄卷十一

欽定四庫全書

史部

伊洛淵源錄卷十二至十四

詳校官編修

臣范來宗

刑部郎中

臣

許兆椿覆勘

總校官編修

臣

王燕緒

校對官編修

臣

盧遂

謄錄監生

臣

施應培

欽定四庫全書

伊洛淵源錄卷十二

宋 朱子 撰

張思叔

名繹嘗記伊川言行一編亦名師說所著詩文甚多今存數篇

遺事

三條

張思叔河南壽安人家甚微年長未知讀書為人傭作一日見縣官出入傳呼道路思叔頗羨慕之問人何以得如此或告之曰此讀書所致耳思叔始發憤從人授

學執勞苦之役教者憐其志頗勸勉之後頗能文入縣學府學被薦以科舉之學不足為也因至僧寺見道楷禪師悅其道有祝髮從之之意時周恭叔行已官維中思叔亦從之恭叔謂之曰子它日程先生歸可從之學無為空祝髮也及伊川先生歸自涪陵思叔始見先生時從學者甚衆先生獨許思叔因讀孟子志士不忘在溝壑勇士不忘喪其元始有自得處後更窮理造微少能及之者矣

見呂氏雜誌又童蒙訓云思叔因讀孟子志士不忘在溝壑勇士不忘喪其元慨然

有得蓋能守此則
無不可為之事

和靖言焞與思叔既相友善伊川歸自涪陵思叔始見
先生思叔穎悟疏通先生亦便喜之自此同遊處先生
以族女妻之甚相敬待家居壽安學者從之漸衆和靖
嘗因侍坐稟伊川曰張繹每聞先生語往往言下解悟
焞聞先生語須再三尋思或更請問然後解悟然它日
持守恐思叔不及焞先生以為然思叔長于為文又善
辦事先生沒未幾思叔亦沒和靖被召嘗曰思叔若在

到今自當召用必能有為于世伊川嘗言晚得二士

見涪

陵記
善錄

張繹思叔三十歲方見伊川後伊川一年卒初以文聞

于鄉曲後來作文字甚少伊川每云張繹朴茂

見祁寬
錄尹和

靖
語

馬殿院

逸士狀

公諱伸字時中

按語錄中作時仲或
作時舉恐亦當兼行

東平人也自弱冠

登第不樂馳騫以階進晦跡州縣人無知者崇寧初元
祐學有禁姦人用事出其黨為諸路學使專糾其事伊
川程先生之門學者無幾雖宿素從遊間以趨利叛去
公方自吏部求為西京司法曹事銳然為親依之計至
則因先生高弟張繹以求見先生初以非其時恐貽公
累公執贄凡十反愈恭且曰使伸得聞道雖死何憾况
不至于死者乎先生聞而歎曰此真有志者遂引而進
之自爾出入凡三年公暇雖風雨必日一造焉同僚相

忌至以飛語中傷之不顧也逮靖康初政樞密孫傅始以卓行薦于朝召既至中丞秦檜素高其節即迎辟為監察御史令人取願狀公曰中丞取臺官但問堪不堪無問願不願居無何遭大變故敵人立張邦昌僭僭于位邦昌初不敢當而賊臣從旁勸進曰相公今姑權宜從事忍死為一城生靈贖命他日為周公為王莽惟相公所為耳邦昌于是俛首唯唯即趨敵帳受偽號既敵人去滋久邦昌恬無自孫意時人皆意邦昌實預邪謀

畏禍無敢言者公首具書請邦昌迎元帥康王書成率
同院簽與俱往相顧無一首肯公遂以書自抵銀臺司
進之吏視書不稱臣辭不受公投袂叱曰逆類吾今日
不愛一死正為此爾而欲吾稱臣耶出即以繳申尚書
省尚書省以示邦昌邦昌得書氣沮恐敗誅甫議迎隆
祐皇后為垂簾計其書大略曰相公閣下服事累朝為
宋寶臣比者不幸迫于勅敵使當偽號非常之事閣下
此時豈以義為可犯君為可忘宗社神靈為可欺所以

忍死須臾而詭聽之者其心若曰與其虛孫于人而實
忘趙氏之宗者孰若虛受于已而實存趙以歸耳是得
春秋祭仲行權之旨而不苟辭其名故天下戶知之而
無一人以相公為非也敵人既北相公于義即合變懼
自列于朝上皇子惟康王在外天下所繫國統有歸宜
即發使通問埽清宮室率羣臣共迎而立之閣下退就
北面之列然後從而引咎以明身為人臣昧于防患不
幸為寇讐脅汚當時不能即死以待陛下今事既定夫

復何面事君請歸死有司以為人臣失節之戒退伏闕
下以俟命如此則明主必能照察以閣下忠實存國義
不苟生棄過錄勞而身名俱榮矣今乃謀不出此時日
已多肆然尚當非據偃寢禁闥若固有之羣心狐疑不
知所謂上天難欺下民可畏成敗之際間不容髮閣下
若以愚言粗有覺悟伏望亟圖猶可轉禍為福于匪朝
伊夕之間此仲所以不敢自外且效愚職分于朝廷過
此以往則閣下包藏既深志慮必異外假設飾事端悵

日待期而實陰結寇讐合從為亂九廟在天雖萬無成
理然伸亦願生不汙與叛逆同朝請先伏死都市以明
此心既而戶部侍郎王及之言于邦昌以上皇寧德宮
府藏所有及池塘魚藕之利可盡取以資國用公復慨
然引義白于都堂曰古者人臣去國其君待之猶三年
然後收其田里君之禮臣猶若此則臣之報君宜如何
今吾君遠狩猶未出疆天下之人方且北首擬欲追挽
而不可得君之府藏燕遊忍一朝而毀乎此與削迹何

異切不可許邦昌不聽今上龍飛公屢拜章以城陷不能救主遷不能死請從竄削上知其忠且有功于國遂擢為殿中侍御史荊湖廣南撫諭以誅邦昌及其黨王時雍還臺言執政黃潛善汪伯彥不法十七事不報嗣上章以臣言可采即乞施行非是臣合坐誣罔大臣之罪移病待命旬日貶濮州監酒稅時用事者恚甚必欲寘之死地以濮迫寇境故有是命有識者為朝廷惜其去至戚嗟相弔且為公危之公以襤被就道無憂懼之

色人益嘆服公天資重厚雖勇于為義而耻以釣名凡所建明輒削其藁故人少知者不幸卒為仇陷于死之公死不得其詳或云時王淵屯淮上受潛善等密旨加不利于公天下知與不知莫不痛之未幾廣陵不守果如公言紹興初乃追贈諫議大夫公居常稱曰志士不忘在溝壑勇士不忘喪其元今日何時溝壑乃吾死所也故其臨事奮不顧身每如此姑擬其大者以補國史之闕謹狀

先君紹興初作此文攜以呈故丞相李公李公許

以達朝廷未及而薨紹興癸酉倅辰陽忽見邸報
宰相秦檜自陳其靖康之功謂它人無預焉先君
遂以此文繳申尚書省大激檜怒送荆南詔獄令
自引虛獄辭皆出吏手先君不得預也奏上又以
情重法輕特削官貶真陽未幾檜死蒙恩東歸繼
復舊物而病不起矣嗚呼痛哉秦檜靖康中為中丞于敵人帳前乞
立趙氏其謀議皆出于先生及察院吳玠敦仁敦
仁為草劄子檜忌人分功深諱其事及見逸士狀
恐先君知而揚辛巳仲冬十日男鎬謹書
之故忿憾至死

續紀

何 鎬

先生調官未嘗擇遠近利害到部但視資當入者卽注擬家東平乃授成都郫縣丞尚在選調至任未幾會納冬米成都浩穰守以委先生先生辭以多弊不可為守問其故先生曰弊之大者由諸司吏人封抄拒之則速禍守曰君既知其弊尚可辭先生至場中則諸色人紛然矣豐飲食玩好文飾美女凡可以盡誅者無所不至前此主者不能自謹一墮計中則束手受制莫敢誰何

先生盡逐之嚴察吏卒不容纖芥負米至者略無留滯
于是蜀人稱詠萬口一辭時提舉常平孫侯按部至成
都境上早行見負擔者假寐道傍以待曉怪而問之俱
應曰今年好受納官某等至無邀阻故爭先詰其主名
曰馬縣丞也孫歎息不已抵郡即呼吏書牒薦之即日
改秩先生常以此語人云人之利鈍自有時但當行直
道無用于人也

先生為奉符丞攝令事方歲歉而朝廷行茶引先生拒

之曰民方救死不贍豈可重困之太守怒曰朝命安可
抗先生曰伸為令誠不忍見民轉溝壑守曰須先劾爾
事乃可行民聞先生被劾爭赴愬諸司或徑達臺省事
遂解又嘗掌市易倖以百緡令售之先生辭以直高倖
強之先生曰伸不敢以詐估官直須伸去乃可欲尋醫
倖懼而止

先生在奉符縣傳伯野在西掖幕雒學遣其子見先生
求二程先生語錄先生曰此書今非其時未敢遽傳其

子固請先生曰第歸尊公若果有志無憚再來既還以告伯野曰吾志欲求道遑恤它乎遂令復至先生乃授之且謂曰尊公既得此書不得久于朝矣未幾果以繳高麗詞頭罷

先生出使過州縣必察民利病餽遺一無所受初至清湘所在民羣聚遮馬首投狀乞留其宰問其善政皆曰不知其它但知知縣到後未嘗有吏下鄉先生即日以舉牒付民使以遺令衆歡然乃去

今姓張失其名

至番禺問諸

司以屬吏之賢者同薦一節度推官

姓黃

曰方陳述生殺

自任官吏無不畏附惟此人敢與之辨曲直幾遭虎口

乃舉之還至舒州從人就縣索夫馬其令不應直至前

曰殿院所合得不敢不供從人分外需索實不能應先

生延之坐且謝之既而謂人曰某以臺官過州縣一令

乃敢拒之是必有氣局者還朝首薦之

令姓周

先生晨興必整衣冠端坐讀中庸一過然後出視事先

生曰吾志在行道使吾以富貴為心則為富貴所累使

吾以妻子為念則為妻子所累是道不可行也故其在
廣陵隨身行李一擔而圖書半之山東已擾而家屬尚
留東平

先生自湖廣還將入奏于道中採訪得執政不法事作
彈文方具藁而先君追及于建康先生喜曰吾有事數
日不能自決望子久矣因出藁相示且曰吾欲首言之
先君曰先生方以使還且當奏職事徐論似未晚先生
曰彼忌我若未及言而有遷除奈何然吾當有以探之

是時方召孫覲謝克家乃言此二人皆小人不可用如
覲親草降表極其筆力以媚敵人受其二女乃負國之
賊也果不報遂除司農卿先生固辭乃繳進彈文時執
政怒甚搜求無以為罪乃指彈文中言邵成章上書事
成章中官也以為趨向不正遂貶公

遺事
三條

崇寧間言者范致虛攻先生為元祐邪說朝廷下河南
府盡逐學徒後數月馬伸及門求見先生辭之伸欲先

棄官而來先生曰近日盡逐學徒恐非公仕進所利公
能棄官則官不必棄也建炎間仲為御史論事公論與

之

見程氏
遺書

靖康二年四月八日監察御史馬伸狀伏見勅敵強梁
劫二帝北行且逼立太宰相公使主國事相公所以忍
死就位者自信敵退必能復辟也忠臣義士不即就死
城中之人不即生變者亦以相公必立趙孤也今敵退
多日吾君之子已知所在訟獄謳歌又皆歸往相公尚

處禁中不反初服未就臣列道路傳言以謂相公外挾
強敵之威使人遊說康王且令南遁然後據有中原為
久假不歸之計伸知相公必無是心但謂敵人未遠因
循未能盡改雖然如此亦大不便蓋人心未孚一旦喧
闐雖有忠義之志相公必不能自明滿城生靈反遭塗
炭辜負相公初心矣伏望相公速行改正易服歸省庶
事取稟太后命令而後行仍速迎奉康王歸京日下開
門撫勞四方勤王之師以示無間應內外赦書施行恩

惠收人心等事權行拘取俟立趙氏子日然後施行庶
幾中外釋疑轉禍為福伊周再作無以復加如以伸言
為不然即先次就戮伸有死而已必不敢輔相公為宋
朝叛臣也謹具申太宰相公伏候鈞旨申時奉鈞旨一
切改正九日追偽赦不行邦昌召侍從官議事晚降手
書請元祐皇后垂簾決政邦昌行太宰事中外大悅追
回諸路赦文并收初四日立宋太后手書不用遣馮澥

李回為奉迎使副

見汪藻所編
實錄草本

胡文定公時政論曰馬伸言黃潛善汪伯彥措置乖方
自言官黜為監當而其言則有狀矣不慎命令則以下
還都之詔也廣布私恩則以復祠宮教官之闕也黜陟
不公則以罷衛膚敏而用孫覲不祥之人也杜塞言路
則以貶吳給張闥邵成章也妨功害能則以沮宗澤與
許景衡也私收軍情則以各置親兵千人請給獨優厚
也同惡相濟則以力庇罪人王安中也凡舉一事必立
一證皆衆所共知亦衆所共見不敢以無為有亦不敢

以是為非而當時不信其言而罷之反以為言事不實而重責之是罰沮忠謹捐軀為國之人惡其毀譽之核實而不亂也邪說何由息公道何由行乎仲既遠貶雖有詔命不聞來期君子憫焉此雖責以龍閣未盡褒勸之禮乞加追獎及其子孫以承天意

見胡文定公集

侯師聖

名仲良河東人二先生舅氏華陰先生無可孫有論語說及雅言一編皆出衡山胡氏

其為人梗槩亦見胡文定公行狀

遺事

三條

人有欲館侯子于其門者侯子造焉則壁垂佛像几積
佛書其家人又常齋素欲侯子從之侯子遂行或問之
侯子曰蔬食士之常分若食彼之食則非矣吾聞用夏
變夷未聞變于夷者也人有父在而身為祖母忌日飯
僧者召侯子侯子不往或問之侯子曰主祭祀者其父
也而子當之則無父矣吾何往焉

見侯子
雅言

胡文定公與楊大諫書云侯仲良者去春自荆門潰卒
甲馬之中脫身相就於漳水之濱今已兩年其安于羈

苦守節不移固所未有至于講論經術則通貫不窮商
略時事則纖微皆察國勢安危民情休戚凡務之切于
今者莫不留意而皆曉也方值艱難之時而使此輩人
老身貧賤亦可慨矣伏望吾兄力薦于朝俾命以官使
得效一職亦不為無補

見胡文
定公集

尹子曰先生謂侯子議論只好隔壁聽

見外
書

或曰江陵有侯師聖者初從伊川未悟乃策杖訪
濂溪濂溪留之對榻夜談越三日自謂有得如見

天之廣大伊川亦訝其不凡曰非從濂溪來耶師
聖後遊荆門胡文定留與為鄰終焉愚按侯子非
荆人據諸書所載但知前數條而胡公行狀亦止
云熟觀二先生之言行不言其見濂溪也濂溪卒
于熙寧六年而侯子靖康建炎之間尚在其題上
蔡謝公手帖猶云顯道雖與予為同門友然視予
為後生則其年輩不與濂溪相接明矣且其言自
謂有得如見天之廣大者亦與侯子平日之言不

相似凡若此類學者詳之

王著作

墓誌略

章憲

福清王先生程門高第諱蘋字信伯世居福之福清自
其考徙平江先生資稟清粹充養純固平居恂恂儒者
及語當世之務民俗利病若習于從政者然不傲名當
世世亦罕知之知府事孫公祐列先生學行于朝召見
賜進士出身除秘書省正字先生為上言曰人心廣大

魚垠萬善皆備盛德大業由此而成故欲傳堯舜禹湯
文武之道擴充是心焉耳帝王之學與儒生異尚儒生
從事章句文義帝王務得其要措之事業蓋聖人經世
大法備在方冊苟得其要舉而行之魚難也未幾兼史
館校勘遷著作郎丐外補通判常州主管台州崇道觀
致仕官至左朝奉郎壽七十有二紹興二十三年五月
戊午疾終于里第葬于湖州長興縣和平鎮茅栗山楊
文靖公時程門先進嘗曰同門後來成就莫踰吾信伯

中書舍人朱公震寶文閣直學士胡公安國徽猷閣待
制尹公燾皆舉以自代胡公論薦尤力謂其學有師承
識通世務使司獻納必有補于聖時

伊洛淵源錄卷十二

欽定四庫全書

伊洛淵源錄卷十三

宋 朱子 撰

胡文定公

行狀略

公諱安國字康侯建州崇安人父淵故宣議郎致仕贈
中大夫母吳氏故永壽縣君贈令人公生于熙寧甲寅
九月二十二日巳時年七歲為小詩有自任以文章道

德之句少長入太學晝夜刻勵同舍有潁昌靳裁之常聞西雒程先生之學獨奇重公與論經史大義公以是學問益強識致日明文辭迥出流輩博士欲令諸職長各呈其文課將攷優劣而去留之皆爭先自送公獨繳還差帖願退就諸生之列中紹聖四年登進士第時策問大要欲復熙豐之政公推言大學格物致知正心誠意以平天下之道詞幾萬言考官得之定為第一將唱名宰執以策中無詆元祐語欲降其等哲宗命再讀諦

聽逾時稱善者數四親擢公為第三除荆南教授正身律物非休沐者不出凡所訓說務明忠孝之大端不以文藝為勸除大學錄學生劉觀石公揆輕俊有名試選屢居上遊一旦觀為人代筆事覺公揆薄遊成訟逾告期不歸為之遊說者甚衆公正色曰錄以行規矩為職職不能守奚以錄為且二人者果佳士而所為如此亦何足惜衆不能奪竟致之法遷博士除提舉湖北路學事公言曰學校所以成就人材非治之也今法令具矣

當使學者于規矩之外有所畏而不為謹按聖門設科成周貢士皆以德行為先文藝為下臣當以此仰奉明詔改使湖南是時蔡京方得志所行事既不善而官吏奉承過當愈為民害學校其一也公獨搏節行之禁其太甚士子持法自肆者懲之常曰韓魏公最善行新法者也所至訪求人材詢問利病禮下賢士刺舉必由公論風采嚴肅郡縣敬畏不敢犯會有詔旨委諸道提舉學官論舉遺逸公以永州布衣王繪鄧璋應詔時蔡京

已惡公不為已用于是屬吏李良輔徑訴于朝稱二人者范純仁之客而鄒浩所請託也京大怒改良輔合入官命湖南提刑司置獄推治人皆為公膽落帥曾公孝廣來唁公退謂僚佐曰胡提舉凝然不動賢于人遠矣獄未成移北路再鞠之訖不得請託之狀直除公名勒停公退居荆門漳水之上定省之外以經籍自娛家人皆忘其貧而親心適焉既而良輔以他罪發覺臺臣乃辯明前事有旨復公官改正元斷然公仕意益薄矣政

和八年張商英相除公成都府路學事公以親年寢高
即上章乞侍養得請滿二年未能朝叅丁令人憂服除
政和末年矣余深入相薦名士十人公與其一有旨召
對公至京師卧疾不出百餘日逡巡謁告而歸宣和元
年除提舉江東路學事復召上殿未受命而中大捐館
舍中大常欲公及時建功立業而毋令人又每以進取
為戒公處其間委曲將順既不失令人之本心又不拂
中大之嚴訓終喪謂子弟曰吾奮迹寒鄉為親而仕今

雖有萬鍾之祿將何所施遂稱疾掛冠買田塋旁築室
勤耕將終身焉宣和末侍臣李彌大吳敏譚世勛合章
薦公經學可用齒髮未衰特落致仕除尚書屯田員外
郎公來謝且辭靖康元年除太常少卿再除起居郎三
辭不允乃至京師方以疾在告一日午枕淵聖急召坐
後殿以俟公即入見奏曰臣聞明君以務學為急聖學
以正心為要心者事物之宗正心者揆事宰物之權也
陛下昔在東宮潛德韜晦其于六經所載帝王制世御

俗之大略必有所避而不欲問官屬之司勸講者必有
所隱而未及陳今正位宸極日月向久而績效未見則
于古訓不可不考若夫分章析句牽制文義無益于心
術者非帝王之學也願擇名儒明于治國平天下之本
者虛懷訪問以深發獨智則天下之幸臣又聞為天下
國家者必有一定不可易之計謀議既定君臣固守雖
浮言異說沮毀搖動而初計不移故有志必成治功可
立陛下南面而朝天下越半年矣而紀綱尚紊風俗益

衰施置乖方舉動煩擾大臣爭競而朋黨之患萌百執
窺觀而浸潤之姦作用人失當而名器愈輕出令數更
而士民不信若不埽除舊迹乘勢更張竊恐姦雄不忌
干戈日尋大勢一傾不可復正望詔大臣詢以修政事
靖邊徼之方令各盡底蘊畫一具進先宣示臺諫仍集
百官議于朝堂衆謀僉同然後斷自宸衷按為國論頒
諸中外以次施行庶幾新政有經可冀中興之效除中
書舍人時門下侍郎耿南仲倚攀附之舊凡大小之臣

與已不同者即指為朋黨見公論學術之奏愠懟形于詞色乃言于淵聖曰安國往者不事上皇今又不事陛下此可謂不臣矣淵聖不納一日問中丞許翰識安國否翰對曰臣雖未識其面然聞其名久矣自蔡京得政以來天下士大夫無不入其籠絡超然遠迹不為蔡氏所汙惟安國一人耳淵聖嗟異焉南仲知淵聖意不可回乃諷臺諫犄角論公稽慢不恭宜從黜削淵聖終不許中書侍郎何臬建議分置四道都總管公上奏曰內

外之勢適平則安偏重則危今州郡太輕理宜通變然
一旦遽以數百州之地分為四道則權復太重假令萬
一抗衡跋扈號召不至又何以待之乎若但委諸路帥
臣專治軍旅每歲一按察其部內或有警急京城戒嚴
即各率所屬守將應援如此則既有擁衛京師之勢又
無尾大不掉之虞一舉而兩得矣巢方得淵聖心密說
以京師不可守則出幸山南可以入蜀而其意蓋自欲
當南道之任又以于公嘗有推挽之力必無駁異及此

奏上大駭謂人曰康侯人物之表乃專以異議為高古人謂山林之士不可用今信然猶不得已于四總管之地各削其遠外州郡而已于後京師被圍西道王襄領所部兵翔翔漢上不復北顧大略如公所策云吏部侍郎馮濟言劉珏行李綱責詞實乃為綱遊說珏坐貶公言侍從之臣雖當獻納至于彈擊官邪必歸風憲各有分守不得侵紊而濟越職妄言上瀆宸聽非所以靖朝著也陛下聖度寬明無私好惡廣開公正之路而濟

無故復稱黨與未殄議論未一宜察姦罔早加懲戒夫
欲殄黨與一議論此蔡京行于崇寧協制異已而遂其
跋扈之謀者何忍更遵用之使羣臣益分門戶迭相排
毀置國勢于傾危乎陛下即位數降詔旨追復祖宗善
政良法而澣獨建言祖宗未必全是熙寧未必全非推
隆王氏之學再挾紹述之議國論至今紛紛未定則澣
之故也于是耿南仲大怒宰相唐恪何臬從而擠之遂
除右文殿修撰知通州行至襄陽而敵騎已薄都城矣

公在省一月告假之日居其半每出必有論列或謂公曰事之小者盍姑置之公曰大事皆起于細微今以小事為不必論至于大事又不敢論是無時可言也敵圍益急淵聖命召公及許景衡旨竟不達今上登極召公為給事中公雖辭避未行而痛憤強敵侵陵心在王室蓋有趨命之意而黃潛善方得政專權妄作斥逐忠賢于心意益戾公因于免奏有言曰陛下撥亂反正將見中興政事人材弛張升黜凡關出納動係安危聞之道

塗揆以愚見尚多未合儻或隱情緘默即負陛下委任之恩若一一行其職守必以顛愚妄發干犯典刑徒玷清時無補國事潛善惡之諷給事中康執權彈擊遂罷除命建炎二年樞密使張浚薦公可大用再以給事中召命州郡以禮敦遣子寅時修起居注上賜之手札曰卿父未到可喻朕旨催促前來以副延佇之意公以建康東南都會上既在是而眷待如此慨然欲入朝行次池州聞幸吳越遂具奏引疾而返除提舉臨安府洞霄

宮紹興元年除中書舍人兼侍講再辭不允遂行以時
政論二十一篇先獻于上復除給事中上以左氏傳付
公點句正音公奏曰春秋乃仲尼親筆實經世大典義
精理奧尤難窺測今方思濟艱難豈于理戎禦侮之際
虛廢光陰耽味文采而已乎陛下必欲削平僭暴恢復
寶圖使亂臣賊子懼而不作莫若儲心仲尼之經則南
面之術盡在是矣除兼侍講專以春秋進講公以學未
卒業乞在外編集庶幾成書可備乙覽未允會除故相

朱勝非同都督江淮荆湘諸軍事公上奏曰勝非當黃
潛善汪伯彥秉鈞之時同在政府緘默傳會循致渡江
南狩之初又下詔令尊用張邦昌結好金國許其子孫
皆得錄用淪滅三綱乃至于此天下憤鬱皆不能平及
正位冢司苗劉肆逆勝非不能死生以之偷合苟容不
顧君父汧江都督用人得失係國安危恐勝非不足倚
伏詔勝非改除侍讀召赴行在命門下檢正黃龜年書
行公上奏曰由臣愚陋致朝廷侵紊官制既失其職當

去甚明且公羊氏以祭仲廢君為行權先儒力排其說
蓋權宜廢置非所施于君父春秋大法尤謹于此臣方
以春秋進讀而與勝非為列有違經訓縱臣無耻公論
謂何是時左相呂頤浩都督江上還朝欲傾右相秦檜
未得其方過姑蘇太守席益知其意謂之曰目為朋黨
可矣然黨魁在瑣闥當先去之頤浩大喜力引勝非為
助而據公奏擬進責命曰安國屢召偃蹇不至今始造
朝又數有請豈不以時方艱難不肯致身盡瘁乃欲求

微罪而去其自為謀則善矣百官象之如國計何遂落
職提舉建昌軍仙都觀實八月二十一日也是夕彗出
東南檜三上章乞留公不報即解相印去位侍御史江
躋上疏極言勝非不可用安國不當責右司諫吳表臣
上疏言安國扶疾造朝亦欲行其所學今無故罪去恐
非所以示天下也奏皆寢頤浩即排黜給事中程瑀起
居舍人張燾及躋表臣等二十餘人云以應天變除舊
布新之意臺省為之一空勝非遂相公登舟稍稍泝流

三日而後行次衡梁訪醫留再旬至豐城寓居又半年
乃渡江而休于衡嶽之下為終焉計買地誅茅結屋數
間名之曰書堂頽然當世之念矣初王荊公盡屏先儒
以為淺陋獨用己意著三經新說離析字畫偏旁謂之
道德性命之學于春秋聖人行事之實漫不能曉則詆
以為斷爛朝報直廢棄之不列于學宮下逮崇寧防禁
益甚故家遺俗或存三傳舊本見者撫歎或遂指以為
春秋而仲尼經世之心幾于熄矣公自壯年即有服膺

之志嘗曰六籍惟此書出于先聖之手乃使人主不得聞講說學士不得相傳習大義漸滅古史淪亡殆由此乎于是潛心刻意裒古今諸儒所著述無慮百家片言之善采拾靡遺害義切深必加辨正或去或取無一毫好惡之偏蓋準則之以語孟權衡之以五經證據之以歷代之史窮研玩味游泳沉酣者三十年及得伊川先生所作傳其間精義十餘條若合符節益以自信探索愈勤至是年六十有一而書始就慨然歎曰此傳心之

要典也蓋于克己修德之方尊君父討亂賊之義與存天理正人心之術未嘗不屢書而致詳焉紹興五年二月除徽猷閣待制知永州不拜差提舉江州太平觀令纂修所著春秋傳俟書成進入以副朕崇儒重道之意仍給吏史筆札委疾速投進公嘗謂宮觀之任本以養老優賢非因避職及獲譴義不欲請也及此除乃上表謝曰謹修有用之文少報無功之祿即再加刪潤繕寫奏御上屢對近臣稱善謂深得聖人之意非諸儒所及

也乃除公提舉萬壽觀兼侍讀委所在守臣以禮津遣公以疾未行御史中丞周秘侍御史石公揆司諫陳公輔遂論公學術頗僻行義不修復除知永州提舉江州太平觀久之上念公訓經納諫之忠特除寶文閣直學士以紹興八年四月十三日沒于正寢贈左朝議大夫公負傑出絕異之資見善必為為必要其成知惡必去去必絕其根自幼少時已有出塵之趣登科後同年宴集飲酒過量是後終身不復醉嘗好奕棋先令人責之

曰得一第德業竟耶是後不復奕為學官京師同僚多
勸之買妾事既集慨然歎曰吾親待養千里之外曾是
以為急遽寢其議亦終身不復買妾也在長沙日按行
屬部過衡嶽愛其雄秀欲一登覽已戒行矣俄而思曰
非職事所在也即止晚居山下五年竟亦不出也罷官
荆南僚舊餞行于渚宮呼樂戲以俟而交代龜山楊公
時具朝膳留公鮭菜蕭然引觴徐酌置語益案間清坐
講論不覺日晷云暮也壬子赴闕過上饒有從臣家居

者治饌延公飾姬妾請令出奉卮酒為壽公感然曰二
帝蒙塵國步机隍豈吾徒為宴樂之日敢辭其人赧然
而止辭受取捨一介之微必度于義雖飢不可得而食
寒不可得而衣也恬靜簡默寡于言動雖在宴閒獨處
未嘗有怠容慢色語益五經諸史周而復始至老未嘗
釋手每晨昏子弟定省必問何所業有矜意則曰士當
志于聖人勿臨深以為高見怠慢不虔必顰蹙曰流光
可惜將為小人之歸矣子弟或近出燕集雖夜已深猶

未寢必俟其歸驗其醉否且問其所集何客所論何事
有益無益以是為常士子有自遠來學者公隨其資性
而接之大抵以立志為先忠信為本以致知為窮理之
漸以敬為持養之要每誦曾子之言曰君子之愛人也
以德小人之愛人也以姑息故不以辭色假借子弟及
學者亦未嘗降志孫言苟為唯諾以祈人之悅也壯年
嘗觀釋氏書後遂屏絕嘗答贛川曾幾書曰窮理盡性
乃聖門事業物物而察知之始也一以貫之知之至也

來書以五典四端每事充擴亦未免物物致察非一以貫之之要是欲不舉足而登泰山也四端固有非外鑠五典天叙不可違充四端惇五典則性成而倫盡矣釋氏雖有了心之說然知其未了者為其不先窮理反以理為障而于用處不復究竟也故其說流通莫可致詰接物應事顛倒差繆不堪點檢聖門之學則以致知為始窮理為要知至理得不迷本心如日方中萬象畢見則不疑所行而內外合也故自修身至于天下國家無

所處而不當矣來書又謂充良知良能而至于盡與宗門要妙兩不相妨何必舍彼而取此夫良知良能愛親敬長之本心也儒者則擴而充之達于天下釋氏則以為前塵為妄想批根拔本而殄滅之正相反也而以為不相妨何哉公于出處由道據義以心之所安為主其欲出也非由勸勉其欲去也不可挽留朱震被召以出處問公公曰世間惟講學論政則當切切詢究至于行已大致去就語默之幾如人飲食其飢飽寒溫必自斟

酌不可決之于人亦非人所能決也安國出處自崇寧
以來皆內斷于心雖定夫顯道諸丈人行皆不以此謀
之也定夫者游察院酢也顯道者謝學士良佐也與楊
時中立皆二程先生之高弟公不及二程之門而三君
子皆以斯文之任期公謝公嘗語朱震曰胡康侯正如
大冬嚴雪百草萎死而松栢挺然獨秀也使其困厄如
此乃天將降大任焉耳公尚論古人則以諸葛武侯為
首于本朝卿相則以韓忠獻公為冠慕用鄉往言必稱

之性本剛急及其老也氣宇粹溫儀貌雍穆于和樂中有毅然不可犯之象于嚴正中有薰然可親近之意年寢高矣加以疾病而謹飭于禮無異平時每歲釀酒一斛以備家廟薦饗之用造麴蘖治秫米潔器用節齊量無不親之其于祭也必沐浴盛服率子孫諸婦各執其事方饗則敬已祭必哀濟濟促促如祖考之臨之也雖在離亂遷次居處衣食或有不給而奉先之禮未嘗或闕由少至老食不兼味深居疾病膳羞不可致子孫或

請稍近城郭公曰死生有命豈以口體之故移不貲之
軀哉家世至貧轉徙流寓遂至空乏然貧之一字于親
故間非唯口所不道故亦手所不書嘗戒子弟曰對人
言貧者其意將何求汝曹志之凡財利假貸劑約必明
期日必信無少差忒自登第逮休致凡四十年其在實
歷之日不登六載雖數以罪去而愛君之心遠而愈篤
每被召即置家事不問或通夕不寢思所以告吾君者
然宦情如寄所好不在焉二程門人侯仲良久居三川

多識賢公卿士大夫之所為而熟觀兩先生之德行又嘗周流天下泛求人物鮮有可其意者後至漳濱公館留之逾年仲良潛察公心意于言笑動止之間不覺歎服語人曰視不義富貴如浮雲者當今天下惟公一人耳初娶李氏繼室王氏皆贈令人子三人寅左奉議郎試尚書禮部侍郎兼侍講寧將仕郎宏右承務郎女適右迪功郎向沈孫大原大正塋于潭州湘潭縣龍穴山禮官議以道德博聞純行不差諡公為文定

伊洛淵源錄卷十三

欽定四庫全書

伊洛淵源錄卷十四

宋朱子撰

程氏門人無記述文字者

王端明

名巖叟字彥霖大名元祐中為臺諫官登政
府正直不撓當世稱之墓碑本傳記其行事甚
詳然不及其學問源流也惟遺書前篇有其答

問而其集中亦有記先生語數條又祭明道文
有聞道于先生之語及伊川造朝亦有兩疏推
挽甚力蓋知尊先生者然恐其未必在弟子之
列也

劉承議

名立之字宗禮河間人敘述明道先生事者其
父與二先生有舊宗禮早孤數歲即養于先生
家娶先生叔父朝奉之女郭雍稱其登門最早

精于吏事云

林大節

不詳其鄉里名字行實但遺書云林大節雖差
魯然所問便能躬行然則亦篤實之士也

張閔中

不詳其名字有答書見文集

馮聖先

名理汝州人陳恬叔易為作誌文尹公再題其

後其子忠恕從尹公學涪陵記善錄者也誌跋
皆見錄中外書又載尹公之言先生門人馮理
字聖先自號東臯居士曰二十年聞先生教誨
今有一奇特事先生問之理曰夜間燕坐室中
有光先生曰頤亦有一奇特事理請問之先生
曰每食必飽

鮑商霖

名若雨永嘉人有答問數條及錄伊川語一卷

今見文集遺書

周伯忱

名字先毗陵人與其弟恭先伯溫同受學有語
錄及答問各數章今見書集伯忱嘗為臨安教
官其家有伊川帖數紙其一邢和叔問先生謂
二周與楊時似同恕恐二周末可望楊時如何
先生答云周孚先兄弟氣質純明可以入道頤
每勸楊時勿好著書好著書則多言多言則害

道學者要當察此

唐彥思

名棣宜興人有語錄一卷見遺書

謝用休

名天申

潘子文

名旻

陳貴一

名經正與其弟經邦貴叔同受學四君皆永嘉
人名見唐錄

李嘉仲

名處遜洛人亦見唐錄後為中書舍人溺死維
揚

孟敦夫

名厚維人祁寬記尹和靖語云孟敦夫來從伊
川又為王氏學舉業特精獨處一室糞穢不治

嘗獻書于伊川伊川云孟厚初時說得也似其
後須沒事生事一日語之曰子何不見尹惇張
繹朋友間最好講學然三公皆同齒也敦夫見
和靖曰先生令厚來見二公若彥明所願見如
思叔莫不消見否和靖曰只不消見思叔之心
便是不消見惇之心也伊川嘗謂學者曰孟厚
不治一室亦何益學不在此假使灑埽得潔淨
莫更快人意否然伊川之葬門人畏黨禍莫敢

至獨敦夫與尹張范棧邵溥送馬

范文甫

暢中伯

二人不詳其名見楊遵道錄

李先之

名朴贛上人為西京學官因受學焉呂氏雜誌
云李先之周恭叔皆從程先生學問而學蘇公
文詞以文之世多譏之者

暢潛道

名大隱。維人遺書第二十五卷。即其所記也。遺書云。暢大隱。許多時學。乃方學禪。是于此蓋未
有得也。

郭立之

名忠孝。宣徽使達之子。事見伊川年譜。祁寬記
尹和靖語云。忠孝每見伊川。問論語。伊川皆不
答。一日語之曰。子從事于此多少。時所問皆大

且須切問近思外書云郭忠孝議易傳序曰易
即道也又從何道或以問伊川伊川曰人隨時
變易為何為從道也今觀忠孝所著易書專論
互體卦變與易傳殊不同然其子雍辯年譜所
記事甚詳未知孰是

周恭叔

名行已永嘉人遺書第十七卷或云乃其所記
也祁寬記和靖語云恭叔自太學早年登科未

三十見伊川持身嚴苦塊坐一室未嘗窺牖幼
議母黨之女登科後其女雙瞽遂娶焉愛過常
人伊川曰頤未三十時亦做不得此事然其進
銳者其退速每歎惜之嘗酒席有所屬意既而
密告人曰勿令尹彥明知又曰知又何妨此不
害義理伊川歸和靖偶及之伊川云此禽獸不
若也豈得不害義理又曰父母遺體以偶賤倡
可乎上蔡謝公亦言恭叔不是擺脫得開只為

立不住便放了胡文定公亦云人須是于一切
世味淡薄方好不要有富貴相周恭叔才高識
明初年甚好後來只緣累太重若把得定儘長
進在

邢尚書

名恕字和叔其行事詳具國史及邵伯溫辯誣
等書云邢和叔後來亦染禪學其為人明辯有
才後更曉練世事其于學亦日月而至焉者也

又云謝良佐曾問涪州之行知其由來乃族子與故人耳先生曰族子至愚不足責故人情厚


不敢疑

族子謂程公孫故人謂邢恕

孟子既知天安用尤臧

氏因問邢七雖為惡然必不到更傾先生也先生曰然邢七亦有書到頤云屢于權宰處言之不知身為言官却說此話未知傾與不傾只合救與不救便在其間又問邢七久從先生想都無知識後來極狼狽先生曰謂之全無知識則

不可只是義理不能勝利欲之心便至于此也
上蔡語錄云邢七自言一日三點檢伯淳曰可
哀也哉其餘時勾當甚事蓋放三省之說錯了
可見不曾用功又多逐人面上說一般話伯淳
責之邢曰無可說伯淳曰無可說便不得不說



伊洛淵源錄卷十四